

Wer sucht, der dut aach finne

Wie isch die letzd Woch dess Kättche uff de Gass getroffe unn isch noochem Schorsch gefroochd habb, doo hottse gelachd unn seet: Hodder dir schunn vunn unserm Gedächtnistraining verzählt? Naa? Doo will isch dess jetz mache.

Vor e paar Daach grad wies su e bissi warm gewese iss hawwe merr uff unserne Terrass gesetze unn hawwe in de Gadde geguggd. Uff oomol iss e Eichhörnche dorsch die Beem gehibbd unn doo rieht de Schorsch: Heh du, suchsde doi Niss vumm letzde Johr? Odder waaßde nimmi, wo du se vergrawe host?

Dess Eichhörnche hott enn mords Schreck kriecht unn iss stifte gonge.

Doo moont de Schorsch: Vunn su emm Eichhörnche kenne merr ebbes lerne. Dess muss nämlich in soim Gedächtnis hawwe, wos im Herbst die Niss vergrawe hott unn im Winder musses seh, wo se die widder finne kann. Kättche, dess mache merr aach emol, versteggele unn suche.

Widder su Bosse vumm Schorsch, saach isch, awwer recht hodder joo, grad mir Alde misse unsere Gedächtnis trainiern. Unn, wie habbderr dess gemacht?

Dess Kättche druff: De Schorsch hott gesaad, dess mache merr jetz mett Ostereier. Vunn dene, die du gefärbt host, nemme merr zeh Stick unn dun se sesomme versteggele unn zwaa Daach späder dust du unn aach isch gugge, ob merr se widder finne dun.

Dess hawwe merr aach gemacht, im gonse Haus hawwe merr die Eier versteggeld, oons defoo aach in de Garaasch unn zwaa im Gadde.

Zwaa Daach späder seeder: Jetz dusde mol suche, isch bleib in de Kisch unn du derr nitt zugugge, unn wennde ferrdisch bist fong isch oo ze suche unn doodenooch dun merr vergleiche, wer die meisde Ostereier gefunne hott.

Su hawwe merr dess gemacht unn isch hädd alle zeh Eier gefunne, wenn nitt onn ooner Stell nitt e Ei, naa, enn Zeddel geleesche hädd vumm Schorsch, doo hott druffgestonne „Ei, Ei, wo isses donn?“

Wie isch in die Kisch zurigg kumme bin, iss de Schorsch uff die Such gonge, awwer der iss unn iss nitt ebei kumme unn wie merrs donn ze long gedauert hott bin isch enaus, doo hodder midde im Gadde gestonne unn hott sich omm Kobb gekratzt.

Wiffell hosden gefunne?, habb isch gefroochd.

Ei siwwe Stick unn oon Zeddel, wo isch dess Ei schunn geklaut unn schunn gesse habb.

No ja, saach isch zum Schorsch, zwaa mussde noch suche, odder?

Du musst merr helfe, seeder doo, isch waaß nimmi, wo se sinn.

Unn isch habbsem donn gezeischd, mir hawwe neu Eier unn den Zeddel oigesommeld unn isch saach: Wer sucht, der dut aach finne, odder?

Doo seeder: Wennde willst, kenne merr dess joo effderr mache meddem Gedächtnistraining. Du bist joo noch gut druff, awwer isch muss halt noch e bissi trainiern.

Doo saach isch unn grins: Isch waaß aach schunn was merr versteggele unn donn suche due.

De Schorsch war gons neigierisch: Ei was donn?

Honnes, seets Kättche, isch musst joo werklisch lache wie isch dem Schorsch gesaad habb: Doin Audoschlüssel, denn dusde doch suwiesu de gonse Daach suche.